

Bicol - Karangahan Kasuratan - Comfort Scriptures

2 Corinto 1:2-4 Mapasaindo logod an biyaya asin katoninongan nin Dios na satong Ama asin ni Jesu-Cristo na Kagurangan. 3 Pasalamatanta an Dios asin Ama ni Jesu-Cristo na satong Kagurangan, an maheherakon na Ama, asin Dios na ginigikanan kan gabos na karangahan. 4 Rinaranga niya kami sa gabos ming kasakitan, tanganing an iba man na mga nagtitios maranga mi kan iyo man sanang karangahan na itinao niya samo.

Talinhaga 15:13 An pusong magayagaya minapaogma nin lalawogon, alagad an pusong mamondo minapaluya nin boot.

1 Hade 8:66 Kan ikawalong aldaw pinapuli ni Solomon an mga tawo. Benendisyonan kan mga tawo si Solomon asin maogma sindang nagpuli huli kan gabos na bendisyon na itinao nin Kagurangan sa saiyang sorogoon na si David sagkod sa banwaan nin Israel.

1 Cronica 16:10 Magmuraway kita sa banal niyang ngaran; mag-ogma an mga pusong naghahanap sa Kagurangan.

Talinhaga 12:25 An kahaditan minapagabat kan puso nin tawo, alagad minapaogma saiya an marahay na tataramon.

Talinhaga 13:12 Kun nawawara an paglaom naroronot an puso, alagad an kamawotan na naotob nagtatao nin kaogmahan.

Isaias 30:26 An liwanag kan bulan magigin siring sa aldaw, asin an aldaw magigin pitong beses an kaliwanagan ki sa dating liwanag kaini, arog sa liwanag nin pitong aldaw na nagliwanag sa saro sanang aldaw. An gabos na ini mangyayari kun bolongon dangan paomayan na nin Kagurangan an mga lugad na itinao niya sa saiyang banwaan.

Oseas 13:8 Sasalakayon ko kamo siring sa sarong oso na nawaraan kan saiyang mga ogbon, saka roronoton ko an saindong mga daghan. Siring sa sarong leon, kakakanon ko kamo, asin pepedasohon arog sa pagpedaso kan sarong lalaw na hayop.

1 Samuel 1:8-10 Hinahapot siya ni Elkana na saiyang agom, “Hanna, tadtaw ta naghibi ka? Tano ta habo kang magkakan? Tadtaw ta mamondo ka? Bakong mas mahalaga ako saimo ki sa sampolong aking lalaki?” 9/10 Kan sarong pagdalaw ninda sa Shilo, pakatapos nindang magkakan asin mag-inom sa harong nin Kagurangan,

mamondong nagtindog si Hanna asin mapait na nagtangis mantang namimibi sa Kagurangnan. Kan oras na idto, nagtutukaw an padding si Eli sa saiyang lugar sa may pintoan kan templo nin Kagurangnan.

Salmo 25:16,17 Hilingon mo ako dangan kaherakan, huli ta ako mamondo asin nasasakitan. 17 Sa puso ko halea an kapurisawan; hawasa ako sa sakong mga kahandalan.

Salmo 34:18 Harani an Kagurangnan sa mga nagmomondo; iliniligtas niya an mga nawaraan nin paglaom.

Salmo 38:8 Ako pinanluluya, talagang pagal na; nag-aagrangay huli ta an puso nahohorasa.

Salmo 55:4 An sakuyang puso nakukulogan, minahugpa sako an mga hampak nin kagadanan.

Salmo 61:2,3 Ako minaapod saimo hale sa poro kan daga, kan an sakong puso pinanluluya. Sa sarong ligtas na lugar daraha ako, 3 huli ta ika an pailihan ko, sarong pusog na bantayan tumang sa mga kaiwal ko.

Salmo 62:8 Sa gabos na panahon, magsarig kamo sa Dios, O sakong banwaan. Isabi nindo saiya an gabos nindong kasakitan, huli ta siya an satong pailihan.

Salmo 73:26 Pwedeng panluyahon an sakong isip asin hawak, alagad an Dios iyo an sakong kosog; siya sana an kaipuhan ko sagkod lamang.

Salmo 77:2,3 Sa aldaw nin sakong kasakitan hinahanap ko an Kagurangnan; magdamlag na iniitaas ko an sakong mga kamot sa pagpamibi, alagad daing nakukuang karangahan an sakong kalag. 3 Kun iniisip ko an Dios, ako nag-aagrangay; kun ako naghohorophorop, nanluluya an sakong boot.

Salmo 86:11 Kagurangnan, itukdo mo sako an saimong dalan, tanganing maglakaw ako sa saimong katotoohan, bilog na pusong matakot sa saimong ngaran.

Salmo 109:22 Ako dukha asin mayong sukat; nakukulogan nin makuri an puso ko.

Salmo 112:7,8 Dai siya natatakot sa maraot na bareta; makosog an saiyang pagtubod asin nagsasarig siya sa Kagurangnan. 8 Dai siya nahahandal o natatakot; aram niyang madadaog an saiyang mga kaiwal.

Salmo 143:4 Kaya pinanluluya an sakong espiritu, asin natatakot an puso ko.

Salmo 147:3 Binobolong niya an mga pusong naraot, an mga lugad ninda saiyang binubugkos.

Talinhaga 14:30 An isip na matoninong minatao nin marahay na hawak, alagad an pag-imon nakakaagid sa helang na kanser.

Ecclesiastes o an Parahulit 1:13 Hiningowa kong siyasaton asin adalan an gabos na bagay na ginigibo sa kinaban na ini. Mamondong palad an itinao nin Dios sa sato.

Ecclesiastes o an Parahulit 2:10 Nakamtan ko an anoman na minawot ko. Dai ko isinayuma sa sadiri ko an anoman na kaogmahan. Ipin-orgulyo ko an gabos na ginibo ko, asin ini an premyo kan gabos kong ginibo.

Ecclesiastes o an Parahulit 2:22,23 Ano an makukua nin tawo sa pagtrabaho asin pagpagal sa kinaban? 23 Huli ta an gabos niyang aldaw pano nin kasakitan, asin kulog nin boot; maski sa banggi daing pahingalo an saiyang isip. Ini mayo man nin halaga.

Ecclesiastes o an Parahulit 11:10 Lingawan nindo an anoman na kahandalan nin isip o kulog nin hawak, huli ta dai man mahahaloy an saindong pagkanihoben.

Isaias 30:29 Alagad kamo, banwaan nin Dios, magigin maogma asin mag-aawit kamo siring kan saindong ginigibo sa pagkabanggi nin sarong banal na pyesta. Magigin maogma kamo siring sa mga naglalakaw sa tugtug kan plawta pasiring sa Templo nin Kagurangan, an Gapo nin Israel.

Isaias 57:15 “Ako an halangkaw asin banal na Dios, na nabubuhay sagkod lamang. Nag-eerok ako sa sarong halangkaw saka banal na lugar, alagad nag-eerok man ako sa kaibahan kan mga tawong mapakumbaba saka nagsosolsol, tanganing ibalik sa sainda an saindang pagsarig asin paglaom.

Isaias 65:14 Mag-aawit sinda sa kaogmahan, alagad maghihibi kamo sa dakulang kamondoan.

Isaias 66:13,14 Rarangahon ko kamo sa Jerusalem, siring kan pagranga nin sarong ina sa saiyang aki. 14 Kun mahiling na nindo na nangyayari ini, maoogma kamo; ini an magpapakosog asin magpapatoba saindo. Dangan maaaraman nindo na ako, an Kagurangan, an nagtatabang sa mga nagkukuyog sako, asin ipinapahiling ko an sakong kaanggotan tumang sa sakong mga kaiwal.”

Jeremias 15:16 Nagtaram ka sako, asin dinangog ko an lambang

tataramon mo. Sadiri mo ako, Kagurangnan Dios nin mga hukbo, kaya an saimong tataramon kaogmahan asin kagayagayahan kan sakong puso.

Jeremias 24:7 Itatao ko sainda an pusong mag-aako na ako iyo an Kagurangnan. Dangan magigin banwaan ko sinda, asin ako an magigin Dios ninda, huli ta mabalik sinda sako sa bilog nindang puso.

Juan 14:1 Sinabihan sinda ni Jesus, “Dai kamo maghadit. Magtubod kamo sa Dios, magtubod man kamo sako.

Juan 14:27 Katoninongan iwinawalat ko saindo; an sakong katoninongan itinatao ko saindo. Bako iyan arog kan pagtao kan kinaban. Dai kamo mahadit ni matakot.

Juan 16:6 Ngunyan ta sinabi ko na ini saindo, napano nin kamondoan an saindong mga puso.

Juan 16:22 Arog kamo kaiyan: mamondo kamo ngunyan, alagad mahihiling ko kamo liwat, asin an saindong puso mapapano nin kaogmahan na dai maaagaw saindo nin siisay man.

Gibo 2:46 Aroaldaw nasa Templo sinda. Sararo sinda sa pagbaak kan tinapay sa mga erokan ninda, nagkakarakan na may kaogmahan asin kapakumbabaan sa puso.

Roma 9:2 kun nagsasabi ako na makuring gayo an kamondoan ko asin mayong kataposan an kulog sa puso ko

2 Corinto 2:4 Sinurat ko idto na pano nin kasakitan asin kamondoan an puso ko, saka kanigoan an luhang pinabulos ko, bakong tanganing pamondon kamo, kundi tanganing maaraman nindo kun gurano an pagkamoot ko saindo gabos.

Efeso 5:19 Mag-orolay kamo sa paagi nin mga salmo, himno saka mga banal na awit; mag-awit kamo nin mga himno saka mga salmo sa Kagurangnan na nasa puso an pag-omaw saiya.